

## Михаил Иванович Сырокваша

Чужис 1926 вося йирым төлысь 10 лунö Брянск обласьтлөн Климово районса Плавка сиктын.

1943 воын М.И. Сыроквашаос босьтисны фронт вылö. Михаил Иванович воюйтис 3-өд Белорусскöй фронт вылын 39-өд армиялөн 262-өд стрелкөвöй дивизияса 945-өд стрелкөвöй полкын, кодкөд öтгшöтш мездис Белоруссия да Литва, босьтис Асыввыв Пруссия. 1945 вося ода-кора төлысь помын 39-өд армиясö вуджөдिसны Монголияö, Китайкөд суйөр дорö. Квантунскöй армия пасьвартöмын участвуйтигөн 262-өд дивизия медводдзаөн вуджис Хинган гöра. Та бöрын дивизиялы сетисны Хинганса ним. Пехота отделениеса командир Михаил Сырокваша участвуйтис нималана Порт-Артур мездöмын.

М.И. Сырокваша демобилизуйтчис 1950 вося йирым 10 лунö. Машинистъясö велöдан школа помалöм бöрын Михаил Ивановичöс индисны «Изьва» депоö (öни Сосногорск). М.И. Сырокваша уджалис паровозса, тепловозса машинистөн, инструктор-машинистөн, Войвывса көрт туйлөн Сосногорскса отделениеын локомотивъяс уджөдöм бöрся видзан юкөнса начальникöс вежысьөн. Көрт туй вылын уджалан стажыс – нелямын во.

Михаил Ивановичöс унаысь бöрйылисны Ухта карса сöветö депутатөн, сідзжö сійö вöли «Сосногорск» станциялөн көрт туй узелса партбюроö пырысьөн, Войвывса көрт туйлөн Сосногорскса отделениеын аппаратса месткомөн веськөдлысьөн.

Пенсия вылö петöм бöрын Михаил Иванович зіля босьтчис öтйöза уджö. Сійö пуктö уна вын том йöзöс Чужан му радейтны да пыдди пуктыны велөдöмö, тшöкыда воывлө велöдан учреждениесö да нуөдö сэни челядьлы смеллун йылысь урокъяс.

М.И. Сырокваша быдтис куим пиös, нель внукös. Сылөн быдмöны и правнукъяс.

Михаил Иванович Сыроквашалөн эм уна награда: Айму вöсна тышлөн II тшупöда орден, «Гöрд Звезда» орден, «Смеллунысь», «Японияös вермöмысь», «1941-1945 воясса Айму вöсна Ыджыд тышын Германияös вермöмысь» медальяс, а сідзжö «Сосногорск» муниципальнöй районса почёта гражданин» ним.